

10<sup>e</sup> Paris 17. 12. 1717

A D V I S  
A MESSIEVRS  
D E  
L'ASSEMBLEE.

M. DC. XVII.

THE NEWBERRY  
LIBRARY

Case  
F  
39  
326

1617a



ADVIS A MESSIEURS DE  
*l'Assemblée.*

**M**ESSIEURS, Puis qu'il a plu au Roy vous appeller au plus important Conseil qui se tiendra iamais dans son Royaume, auquel on traitera de la reformation, ou pour mieux dire, de la conseruation de cest Estat; Vous deuez desirer que chacun vous ayde à soustenir ce pesant fardeau, & contribue sur ce sujet quelque bon aduis suiuant sa portee. Ayez donc agreable que ie vous presente celuy-cy, sans artifice. Mon dessein n'est pas de paroistre sçauant ou eloquent, ains seulement bon François: C'est le seul partage qui m'est resté de la succession de mes ayeuls; la gloire d'estre sorty de gens de bien, & qui aux premieres charges ont tres-dignement seruy. Comme ils ont fait voir leur fidelité parmy les grands employs, en ma solitude ie tascheray pour le moins à tesmoigner mon affection.

La France est diuisee en trois Ordres, l'Eglise, la Noblesse, & le Tiersestât: Permettez-moy que ie vous face voir en gros les maladies de chacun de ces corps, & les remedes que ie croy les plus conuenables: apportez-y le temperament, & ie m'asseure que Dieu les benira.

Pour le premier, representez au Roy que le droit de nomination qu'il a aux benefices con-



historiaux, succede aux elections qui se faisoient anciennement, où le S. Esprit estoit inuoqué & deuoit presider : Et partant qu'il en doit vser avec tres-grande crainte, comme de chose dont il rendra compte irremissiblement deuant Dieu.

Qu'il doit faire veoir par des Commissaires choisis le Concile de Trente, à fin qu'en ce qui est de la foy on le recoiue, & que pour ce qui regarde ou la liberté de l'Eglise Gallicane, ou les droicts du Royaume, ou la feureté mesmes des Edicts de Pacification, il y soit pourueu.

Qu'il ne donne plus de pensions sur les Euefchez, afin que ceux qui sont appelez à ce haut ministere puissent dignement s'acquitter de leur deuoir, soit au spirituel par leurs predications & bon exemple, soit au temporel par la distribution du reuenue suiuant les saincts Canons.

Qu'il n'accorde plus de coadiutoreries que aux termes de droict.

Que la prohibition de la pluralité des benefices si religieusement faite par tous les Conciles soit rigoureusement obseruee en France, & si le Pape par importunité s'en dispense, que les Parlemens recoiuent les appellations comme d'abus, de ses octrois surprins en la Chancellerie, & que chacun les puisse impetrer par incompatibilité.

Que toutes les Abbayes soient remises en regle, Dieu sera mieux seruy dans les Monastères : la discipline sera entre les mains des Abbez, qui seront eux mesmes subiects aux visites des Generaux. Ces belles & grandes maisons, mar-

ques de la pieté de nos peres, ne seront pas en ruyne comme elles sont: Et quand elles seront remises en bon estat, les Gentilshommes dans la campagne seront bien aises d'y placer vn de leurs enfans: & outre, ceux qui seront pourueus en ceste façon dans les familles particulieres seront obligez de se contenter, sans reuenir à partage, inconuenient qui n'est pas petit.

Que le revenu des beneficiers non residens demeure affecté irreuocablement aux hospitaux.

Que les dévolus soient permis sur les benefices consistoriaux: aller au contraire est combattre directement le saint Esprit.

Qu'il soit de nouveau procedé au régallement des Decimes, afin que les pauvres Curez, qui seuls en patissent, soient aucunement deschargez, & qu'une infinité de peuple qui crie vengeance deuant Dieu, pour se voir sans consolation faute de Pasteur, recoiue le secours ordonné de Dieu. Cela se peut faire sans despen-  
se. Suppliez le Roy de nommer dix de ses Officiers qui ayent soin de retirer les baux à ferme de six annees dernieres de tous les benefices de France par dioceses pour en faire vne commune: Ce pied estant fait, le reste ne sera pas mal aisé. Outre cela la maison de ville de Paris offre de le faire à ses despens.

Pour le second, demandez la preference pour la Noblesse aux Offices & aux benefices: elle est iuste & sans enuie.

Que les charges de la Guerre & de la Maison



du Roy ne soient plus en vente.

Que toutes les suruiuances soient reuoquees, & que ceux à qui on en a donné, soient obligez d'opter.

Que par loy fondamentale du Royaume tous Gouuernemens & generaux & particuliers finissent desormais dans trois ans, & ne puissent estre continuez que pour six au plus. Ne craignez pas que ce point soit dangereux ou malaisé : donnez hardiment le conseil, le Roy l'excutera sans peine : les peuples le desirent violement, toute la Noblesse a interest qu'il se face : ce sont les deux bras de l'Estat, pourueu qu'ils conspirent à quelque chose, il n'y a point de puissance assez forte pour resister. Ce seul moyen osterà pour iamais l'apprehension des guerres ciuiles. Le Roy pourra recompenser ses seruiteurs sans fouler son peuple. Bref il fera Roy en effect, au lieu que veritablement il ne l'est qu'en tiltre dans les citadelles & places fortes de France. L'Espagne ne se conserue que par ce secret.

Que s'il ne veut pas mescontenter ceux qui sont en charge, comme personnes veritablement de tres grand merite & de tres-grande recommendation, il peut, sans leur faire tort, les changer de Prouince à autre de temps en temps : Par exemple, celuy qui commande en Bourgogne, apres trois ans seruira en Guyenne, & & ainsi du reste sur ce modele. Que si cela mesmes ne se peut, au moins que la loy s'observe pour les gouuernemens qui vaqueront à l'aduenir.

Donnez aduis au Roy qu'il supprime toutes  
ses Vniuersitez , excepté quatre les plus fameu-  
ses, l'Empire d'Orient n'en auoit que deux, Ale-  
xandrie & Beryte. Et faictes que le reuenu de  
tous les Colleges qu'on osterá par ce moyen,  
soit affecté delormais à des Academies, où la  
Noblesse dans les prouinces sera esleuee & nour-  
rie aux exercices au despens du public. Ainsi  
vous remettrez les arts mechaniques, qui sont  
tout a fait perdus, le commerce qui est abastar-  
dy : & vous deserterez les colues & les Palais,  
où les gens de peu, naiz dans la bouë & la fange,  
font la presse. Le vieux prouerbe dit, *Que la  
science enfle le courage*. Et par consequent dimi-  
nue l'obeyssance. Le Turc est absolu sur ses sub-  
jets par ce que le plus habile d'entre-eux ne sçait  
pas lire. Ils sont tous ou soldats ou marchands,  
ou artisans, ou laboureurs. Je veux croire que  
l'intention de ceux qui nous ont amené ce nôbre  
effrené de Colleges estoit bonne, mais l'expe-  
rience nous a fait voir que les effets en sont tres-  
pernicieux. Premièrement, ils ont fait quantité  
de lettrez, peu de sçauans, & puis la facilité  
a faict que les moindres artisans, & les plus  
pauures laboureurs ont enuoyé leurs enefans  
à ces escolles où on monstre gratuitement :  
Ce qui a tout ruyné. Quiconque a mis le  
nez dans les liures, dès l'heure s'est rendu inca-  
pable de toute autre vacation. Si dans vn bourg  
quelqu'un a appris à escrire & trois mots de La-  
tin, soudain il ne paye plus la taille, il est Procu-  
reur Syndic ou Tabellion, ou Sergent : & par ce



8  
moyen ruyne ses voisins, & chasse les coheritiers. Les sciences ne sont bonnes que pour les grands esprits : si elles en polissent quelques-vns elles en affoiblissent mille autres. Ceux qui courent les rues parlent ordinairement Latin.

T'estime & honore les lettres autant que personne du monde, pourueu qu'elles soient a vn degré tres-excellent. La mediocrité est vitieuse, & pour paruenir à ce haut point de perfection, il faut necessairement assembler en certains lieux ceux qui se voüent à ceste profession, afin que l'ancienne discipline soit vniformement obseruee, & nommément le temps d'estude porté par les constitutions. La conference & l'emulation perfectionnent les esprits. Voyla pourquoy ie souhaite qu'il ny ait plus que quatre Vniuersitez en France.

P O V R le troiesme, Souuenez-vous que le peuple est celuy qui a plus besoin de vostre secours, comme le plus foullé: & neantmoins c'est le plus puissant, il compose les villes: le plus necessaire, il laboure les terres: le plus vtile, il porte tout le fonds à l'Espargne. Nous auons experimenté en ce dernier siecle que c'est de luy que depend la paix & la guerre, & si ie l'ose dire, l'establissement entier de la Monarchie. Le grand Henry, quoy que plein de gloire, & fauorisé de la fortune en mille & mille combats, pour auoir défait ses ennemis autant de fois qu'il les auoit veuz, ne creut iamais son empire affermy, iusques a ce que Paris luy ouurist ses portes: & a son exemple le reste des villes de France.

Tout



Tout ce discours ne tend qu'à vous faire voir que si on contente le peuple, qui est tres-aisé à contenter, pour si peu de soulagement qu'il recoiue, tout est en seureté, au lieu que si on le reduit au desespoir, le premier des Princes ou des grands qui batra aux champs sous quelque pretexte specieux, mettra en compromis la couronne sous le hazard d'une bataille. Tesmoins Arques & Yury.

Cinq choses l'oppriment grandement, les tailles, les logemens des gens de guerre, le sel, les aydes, & la mangerie des Officiers.

La premiere, est celle à laquelle le Roy peut & doit pourvoir plus promptement en le deschargeant d'une partie, & remettant l'autre sur un expedient que ie vous proposeray, plausible & utile. On vous dira peut estre, comme on fit aux derniers Estats Generaux, que le Roy veut auoir son compte, & que le fonds mesmes dont il iouist presentement ne peut pas suffire aux despeses ordinaires: bien loin de les diminuer. Mais ne vous arrestez pas en si beau chemin. Je sçay bien que l'Espagne est espuisee dès les premiers six mois: deux choses sont en cause; les despeses excessiues & inutiles, & la volerie de ceux qui manient la bourse: remediez-y, & puis vous pourfuiurez au reste sans contradiction. Sur tout souuenez vous que vous n'estes pas assemblez pour trouuer de nouueaux expedients à espreindre & tirer la derniere goutte de la substance du peuple. Le Roy en fin a escouté ses pleurs & gemissemens,

& touché de l'esprit de Dieu se resout de le soulager. Voicy les propres termes de vostre conuocation : Nous protestons deuant le Dieu viuant que nous n'auons autre but & intention que son honneur, & le bien & soulagement de nos subiects. Aussi au nom de luy-mesmes nous coniurons & obtestons ceux que nous conuoquons, & neantmoins par la legitime puissance qu'il nous a donnée sur eux, nous leur commandons & tres-expressément enioignons, que sans autre respect ny consideration quelconque, crainte ou desir de desplaire ou complaire a personne, ils nous donnent en toute franchise & sincerité les conseils qui iugeront en leurs consciences les plus salutaires & conuenables au bien de la Chose-publique. Apres cela quelle excuse y pourra-il auoir pour vous si vous ne faiçtes pas bien ? Vous auez vn tres-grand aduantage sur tous ceux qui ont iamais eu l'honneur d'vn pareil employ. Vous auez affaire a vn Prince absolument porté a suivre vos aduis. Parmy les graces que le ciel a versé avec affluence sur son esprit, celle-cy paroist eminemment, il croit son Conseil, & ne se resout qu'avec luy. Je le dis hors de tout soupçon de flaterie, il est plein de pieté, iuste, courageux, ferme & constant en ses resolutions. Voyla pourquoy & vous & ceux qui s'approchent le plus pres de sa personne serez tous coupables deuant Dieu & deuant les hommes, si son regne n'est pas le plus florissant qui ait esté depuis la naissance de ceste Monarchie. Tout conspire a ceste grandeur, nos Princes sont pleins d'affection & d'obeyssance : Ils ont appris combien il est

malaisé, voire impossible de resister, ie ne dis pas a vn puissant Roy, & qui graces à Dieu se peut mettre à la teste de son armee: mais non pas mesmes à l'ombre empruntée de son nom. Agissez donc courageusement & en gens de bien, commencez par le retranchement de la despense, & à ceste proportion vous diminuerez la recepte: examinez l'Estat: Le premier chapitre, c'est la maison du Roy: vous trouuerez qu'elle monte dix fois plus que du temps de ces grands Princes Charles VII. Louys XI. Charles VIII. Louys XII. François I. ils n'en estoient pas moins bien seruis: leur memoire n'en est pas moins glorieuse, & les François en estoient beaucoup plus soulagez. Aussi quand il falloit faire vn effort, il estoit aisé d'en treuuer le fonds dans la bourse des subiets riches & affectionnez, tescmoin la prison du Roy Iean: au lieu qu'à ceste heure s'il faut rachepter quoy que ce soit de cent mil escus d'extraordinaire, si ceux mesmes qui les ont engloutis ne les reuomissent, il n'est pas possible de les trouuer: tescmoin les Triennaux. Le Turc, de qui les loix politiques sont aussi excellentes comme la religion est brutalle, tient ceste maxime de ne prendre les deniers leuez sur le peuple que pour la defense & conseruation d'iceluy, appellant cela *le prohibé sang du peuple*. Lors qu'il faut prendre les armes, & aller à la guerre, ils'ayde des impositions & subsides: mais en temps de paix il vit du seul profit de ses iardins. Representez donc au Roy que s'il veut faire quelque reformation dans son estat, il faut



qu'il donne l'exemple le premier, & qu'il commence par sa maison.

Le second Chapitre sur lequel vous devez ietter les yeux, est celuy des Pensions: Vous croirez peut-estre que ce que ie vous diray soit vn paradoxe, & neantmoins c'est vne verité tres certaine: Les Pensions ont ruyné la Noblesse. Tel qui viuoit commodément & doucement dans sa maison, & qui mesmes aux occasions pouuoit assembler ses amis, mange le reuenu de tout son bien en trois mois, pour venir demander sa Pension. Vn valet ou deux luy suffisoient: son village ne voyoit ne clinquant ny broderie. A la Cour, il a vn Escuyer, des Gentilshommes, des Pages: quantité de plumes, quantité de passement d'or. Voila où s'employe son bien, & ce qui luy reuient de bõ d'une Pensiõ mal payee, biẽ leuee sur le peuple, & encores mieux contee sur le Roy. Et pour preuue de ce que ie dis, Qu'on recherche curieusement s'il y a vn seul Gentilhomme qui ne se soit, ou ruyné, ou incommodé à ce mestier-là: sur vn escu de fonds extraordinaire, ils desseignent dix escus de despenſe: Et c'est ce qui a mené le luxe à ce haut point où il est: Comete maiheureuse, qui presage infalliblement la ruyne des Estats quelle menace. Il y a encores vn autre inconuenient que ce mal produit: C'est que comme il n'est pas possible de donner des Pensions à tous les Gentilshommes, non pas à la centiesme partie: ceux qui n'en ont point ne croient pas deuoir seruir le Roy sans estre payez. Adiouſtons-y encores ceste

raison : Les François s'obligent aisément , & de peu de chose : mais aussi ils ne conferuent pas long temps la memoire des biens-faits , quels qu'ils soient : tescmoin Henry troisieme. Cela vient de leur naturel prompt & leger : aussi voit-on qu'en leurs querelles particulieres ils s'accordent volontiers sans couuer aucune sorte de vengeance sur le cœur, mais aussi tous prests à se couper la gorge avec le meilleur amy qu'ils ayent. Conseillez donc au Roy, que s'il se veut faire adorer parmy eux, qu'il leur donne peu & souuent, rien de certain, ou d'estably: parce que dès l'heure mesmes chacun en fait estat comme de son propre domaine, & croit que cela luy est deub. HENRY LE GRAND a esté le premier qui a dressé vn Estat des Pensions: la necessité l'y obligea: car apres les guerres ciuiles se trouuant grandement incommodé, & neantmoins chargé d'une infinité de Noblesse qui auoit employé tout son bien pour luy aider à conquerir ce Royaume, ne sçachant de quoy les recompenser, creust qu'il leur deuoit pour le moins donner moyen de viure, & de s'acquitter insensiblement. Ceste cause cesse maintenant, peu de ceux qui sont dans l'Estat ont veu ce temps-là. Puis donc que les Pensions ne profitent à personne, quel danger y a-il de les oster?

Après cela, iettez les yeux sur la guerre : & conseillez au Roy de ne tenir plus sur pied que son regiment des Gardes, ses Suisses, & sa Compagnie de Gensdarmes : au mesme estat que le tout estoit durant le feu Roy : Aussi bien le



reste n'est qu'un ombre & un moyen pour voler les finances : Le papier souffre tout. Et à fin que nous ne puissions iamaïs estre surprins, & que nos forces soient redoutables par tout le monde : proposez de faire vne milice generale dans ce Royaume, & que chasque Prouince en cas de necessité soit tenuë d'entretenir & armer à ses despens vn regiment & vne compagnie de canalerie sous la conduite de ceux qu'il plaira au Roy de nommer: Et que ses troupes se mettent en bataille deux ou trois fois l'an, chacune en son endroit, & apprennent les exercices. En ceste façon le Roy sera tousiours asseuré de trois ou quatre mille cheuaux, & de vingt-cinq ou trente mille hommes de pied. Le peuple ne sera iamaïs foulé, parce que premierement il se ra deschargé de ce qui le leue pour les gens de Guerre, qui n'est pas peu : ceste despenſe n'arriuera peut-estre qu'une fois en dix ans, la leuee n'en couſtera rien, ils payeront reglément aux logemens qu'ils feront, parce qu'ils feront leurs monſtres en la meſme façon: Bref, ils viuront en France comme ils viuent par tout ailleurs, c'est à dire, avec ordre & discretion. Il ne faudra plus ny Commissaires, ny Cōtrerolleurs, ny Payeurs, ny Thresoriers de l'ordinaire, ou de l'extraordinaire. Chasque Prouince fera son cas à part, & payera ses gens sans que personne s'en meſſe. Outre, que l'armee sera composee de soldats choisis, bien armez, & qui auront apprins leur mestier, au lieu que maintenant en nos troupes on ne voit que gens ramassez & sans discipline.



Les plus belliqueuses nations du monde en font ainsi, & s'en treuvent bien. Si vous le faictes, vous guerirez la seconde des playes du peuple, qui est le passage des gens de guerre, qui ne peut recevoir remede quelconque que celuy-là: Parce que tandis que les Officiers du Roy feront faire les monstres, l'argent ne viendra iamais à point nommé: & le soldat n'estant point payé, aura droit de viure à discretion, & sera mesme necessité à cela. Quant aux places, où vous iugerez à propos qu'il y ait garnison, faites en sorte qu'on la modere le plus qu'il se pourra: & que en fin ce ne soit qu'une compagnie où il n'y ait qu'un chef, point de membres. Ces ordres sont bons dans les armées, & inutiles dans les places durant la paix.

Ce n'est pas sans raison, que ie desire que vous apportiez vostre iugement pour faire difference des places qui meritent garnison, parce qu'il y a une infinité de chasteaux dans le cœur du Royaume, qu'on deuroit auoir razez & demolis il y a long temps: Tout le reuenu du domaine s'employe à les reparer, ou à l'entretènement des Capitaines qui sont dedans, & des morte-payés, & ce ne sont que nids à voleurs aux moindres mouuements. Le Roy a commencé par Pierre-font: faictes qu'il continuë.

Les Suisses sont cōtenus dans le chapitre quauel sont employées les Pensions estrangeres. Pourquoy faut-il que la France se rende tributaire de ces Bourgmaistres inutiles, qui par capitulation expresse ne vont iamais aux tranchées, aux

assants, aux escarmouches? Le Comte Maurice qui merite le nom de grand Capitaine les mesprise: Le Roy d'Espagne mesmes, quoy qu'affirmé d'hommes, ne s'en est iamais voulu seruir. Perdons ceste vanité de croire que nous l'en auons empesché par nos brigues. Ayant plus d'argent que nous, s'il eust eu ceste passion, il y a long temps qu'il en fust venu à bout: il se contente de les auoir assujettis à garder le Milanois, & la Franche Comté: & nous met en ialousie pour espuiser nostre bourse. Que si on vous dit que c'est pour conseruer le passage d'Italie, ne le croyez pas: vne armee ne scauroit passer par leurs desiroits en deux ans. L'argent qui a esté porté en Suisse depuis la paix, & consumé inutilement, suffiroit pour conquerir toute l'Europe.

On dict que le Duc de Lerme s'est seruy de ce moyen pour faire resoudre le Roy d'Espagne à la paix avec les Pays-bas, luy faisant voir ce que ceste guerre luy coustoit: seruez-vous en aussi. Nous n'auons que trop d'hommes en France, inuincibles au combat & à la fatigue, pourueu qu'ils soient disciplinez: trauallez à cela.

Soubs le mesme chapitre sont compris les regimens entretenus en Hollande. Pourquoi faisons-nous ceste despenſe durant la paix? de quoy nous peuuent-ils seruir? Si c'est à nos guerres ciuiles: pourueu que ceux de la Religion pretenduë reformee ne soient pas de la partie, elles ne feront pas de longue duree: & s'ils y sont

engigez



engagez, n'esperez pas que ceux qui par creance & par raison d'Estat sont obligez à les conseruer, vous aident à les ruyner. Si contre les estrangers, ils sont si foibles, qu'à peine se peuvent-ils conseruer: le naturel inaccessible de leurs Isles, fait qu'ils resistent au Roy d'Espagne: mais d'attendre d'eux qu'ils puissent enuoyer vne armee de secours hors de leurs terres, ce seroit folie: nommément à ceux qui scauent qu'ils ont plus à se garder de leurs peuples mesmes que des ennemis, afin qu'ils ne secoüent ceste liberté imaginaire plus facheuse à supporter que la plus rude domination d'un Prince legitime. Il suffira donc que le Roy les protege & les secoure, lors qu'il en sera besoin. Voila en gros la despense qu'on peut retrancher: adioustez-y le bon mesnage, & empeschez qu'il ne soit pas desrobé, comme il est par tous ceux qui manient son argent: & la France ne vous aura pas peu d'obligation. Je sçay bien que ce n'est pas vn petit ouurage: mais y doit-il auoir rien d'impossible à ceste Assemblée où tous les plus grands esprits de ceste Monarchie sont conuocuez? Voulez-vous que ie vous ouure vn expedient? ne le condamnez pas pour estre vn peu rude: tout grand exemple a ie ne sçay quoy d'iniuste qui se recompense par l'vtilité que le public en reçoit: & les vlceres inueterez ne se peuuent guerir que par des remedes violents. Donnez aduis au Roy qu'il supprime tous les Officiers de finance: à condition neantmoins de leur payer la rente de ce qu'ils monstrent



auoir actuellement porté dans ses coffres, reser-  
 ué vn Tresorier de France és Generalitez, où il  
 y en auoit il y a trente ou quarante ans, & vn  
 Thresorier de l'Espargne. I'aduoue que ce se-  
 roit rigueur tres-grande d'en vser ainsi a vn au-  
 tre subiet : Mais a eux, personne ne les plaindra,  
 ains chacun dira que c'est iustice de presser ces  
 espouges qui auoient espuisé toute la substance  
 de l'Estat. Et de fait, la Noblesse est au biffac : le  
 peuple est à la fin, rien ne paroist que les Finan-  
 ciers : & si dans la robbe longue quelqu'un est  
 plus accommodé que de l'ordinaire, indubita-  
 blement il a recueilly de leurs successions. Les  
 peuples d'eux-mesmes porteront à l'Espargne,  
 sans fraiz & sans diminution, ce qu'on leur de-  
 mandera, comme on a veu le Languedoc, la  
 Guyenne, & la Bretagne le faire souuent : & ces  
 deniers pour n'estre pas exigez par des loups  
 impitoyables, ne marqueront pas moins la puis-  
 sance du Roy, & tesmoigneront beaucoup plus  
 la bonne volonté & l'amour des suiets. Si ce re-  
 mede vous semble trop rude, conseillez pour le  
 moins au Roy qu'il establisce vne Chambre de  
 Iustice, composee de gens au dela de tout soup-  
 çon pour examiner leur vie passée. Et represen-  
 tez-luy que comme ceste recherche sera tres-  
 saincte, la composition en seroit damnable : par  
 ce que ce seroit authoriser le mal & descharger  
 les coupables pour opprimer les innocens.

Toutes ces despeses inutiles estans retran-  
 chees, il sera aisé de diminuer vne partie des  
 Tailles, encores trouuerez-vous que le Roy en

aura beaucoup plus de quitte qu'il n'a : Le sur-  
 plus il le faut reietter sur ce qui entre ou sort du  
 Royaume , a fin que les estrangers seuls sup-  
 portent la despenſe. Et voila l'expedient que ie  
 vous auois promis : Ie vous veux faire voir par  
 demonſtration que ce que ie vous dis eſt infail-  
 lible. Premièrement , nous demeurerons tous  
 d'accord que la France a ce bon-heur du Ciel,  
 qu'elle ſe peut aiſément paſſer de ſes voiſins: ſes  
 voiſins ne ſe ſçauroient paſſer d'elle. L'Eſpagne  
 n'a point de bled, celuy qui peut venir de Dan-  
 zic ne vaut rien : outre qu'il eſt preſque tout  
 pourry , lors qu'il arriue en ſes ports à cauſe de  
 la longueur du chemin. Tout le Séptentrion n'a  
 point de vin: nos ſels, nos paſtels, nos toilles, nos  
 cordes , nos cidres vont par tout le monde, & ne  
 ſe cueillent en abondance que parmy nous. On  
 peut hardiment & ſans rien craindre hauſſer le  
 peage à tel point qu'il plaira au Roy: la neceſ-  
 ſité les obligera de paſſer par nos mains. En vou-  
 lez-vous vn exemple qui n'a point de contre-  
 dit ? Il y a dixhuiſt ou vingt années que le ton-  
 neau de vin valloit ſoixante & quatre-vingts  
 eſcus à Bourdeaux; les Anglois, les Eſcoſſois, les  
 Hollandois l'enleuoient tous à ce prix-là: Main-  
 tenant il ne vaut plus que vingt ou vingt-cinq  
 eſcus. Quelle raiſon y a-il de leur ſouffrir ce  
 gain à noſtre dommage ? Ouy, mais auſſi de leur  
 coſté ils nous rencherirōt les marchādiſes qu'ils  
 nous debitent ? Examinez-en, ſ'il vous plaift, la  
 qualité , & puis vous iugerez l'importancé que  
 ce nous peut eſtre. Il ne nous vient point d'ar-



gent d'Angleterre pour tout. Ceux qui ce sont trouuez à Bourdeaux és temps des foires en peuuent rendre tesmoignage : ils portent des draps, des sarges, quelque peu de plomb & d'estain; & avec cela ils enleuent nos denrees. Les Hollandois nous fournissent en partie de sucres, de drogues, & espiceries. Les soyes nous viennent du Leuant : l'Allemagne nous fournit de cheuaux, l'Italie de manufactures. Toutes ces choses sont si peu necessaires qu'il seroit à propos que l'entree en fust absolument defenduë. Pourquoy faut-il que Milan, Lucques, Genes & Florence nous vendent si cherement leurs draps de soye & toilles d'or & d'argent, qui ne vont qu'au luxe, & par consequent à la ruyne de l'Estat? La seule ville de Paris en consume plus que toute l'Espagne entiere. Le Roy Henry second fut le premier qui porta vn bas de soye aux nopces de sa sœur : maintenant il ny a point de petit vallet qui ne se sentist deshonoré d'en porter vn de sarge : & voyla où va tout l'argent monnoyé de France : Marseille ne fait point de plus grand commerce que celuy-là: quel danger y a-il donc qu'il nous encherissent leurs marchandises? Nous apprendrons peut-estre par ce moyen à nous vestir de nos laines, & à nous seruir de nos draps. Qu'on defende ce nombre espouuantable de carosses qui estonne les murailles de toutes les villes de France, & nommément de Paris; & puis vous n'aurez plus que faire des cheuaux d'Allemagne, qui ne seruent qu'à cela: Et à fin qu'absolument on se puisse passer



d'eux, qu'il plaife au Roy d'ordonner qu'en tous les Prieurez & toutes les Abbahyes de France il y ait vn haras plus grand ou plus petit fuiuant la commodité des lieux, & le departement qui à ces fins fera fai& par les Lieutenans generaux des proninces. Iufques icy on a eu fi peu de foïn du public que le François u'a iamais apprins de fe feruir des aduantages que Dieu luy a donnez par deflus toutes les nations du monde. Il faut fi peu de fucres, d'efpiceries & de drogues pour la neceffité, que la cherté ne nous fçauroit incommoder. Ioint que cela obligera nos marchands à entreprendre le voyage des Indes auffi bien que nos voisins.

Meflieurs, prenez occafion fur ce fubie& de reprefenter au Roy qu'il eft obligé pour la grandeur & reputation de fon Eftat, de reftablir l'Admirauté. A cela il y a deux chofes à faire. Premièrement, à purger cefte vermine d'officiers qui vollent tout le monde : ils ont e&te creez pour la feureté du commerce : & neantmoins ils ne feruent veritablement qu'à piller les marchands, & à defcrier nos ports. Deux Commiffaires enuoyez fur les lieux, avec pouoir de faire & parfaire le procez à ces gens-là, fuffiront pour y remedier. Outre, il faut inftituer vn ordre general pour la nauigation. N'eft ce pas vne honte qu'en trois cens lieues de cofte il ne fe trouuera pas vingt vaiſſeaux François? Et neantmoins, s'il vous plaift d'y mettre la main, nous ferons en peu de temps maiftres de la mer, & ferons la loy à ces Infulaires qui vſur-

pent ce tiltre. Nous auons, sans comparaison, plus de haures qu'eux, plus de bois & meilleur qu'eux pour bastir les nauires, plus de Matelots; tesmoing qu'ils ne se seruent en leurs voyages que de nos Biscains, ou de nos Bretons & Normans. Les toilles, les cordes, les cidres, les vins, les chairs sallées, equipages necessaires, se prennent sur nos terres. Il ne reste plus que donner la forme à ce dessein, la matiere n'est que trop ample. En voicy vn projet : seruez-vous en si vous n'en treuuez point de meilleur; il ne m'importe pas pourueu que la chose se face, & que le public y profite. Que le Roy par Edict ordonne qu'en chaque ville capitale de ses provinces les marchands feront vne compagnie pour la nauigation, sur le modelle d'Amsterdā, & equiperont certain nombre de vaisseaux dans les ports les plus proches & les plus commodés. Et pour les inciter d'auantage, qu'on leur accorde de grands priuileges: comme entre autres, qu'on rabate le dixième des impositions aux nauires François qui entreront ou sortiront sans fraude de nos ports: & qu'il soit defendu à peine de confiscation de corps & de biens à nos Mariniers d'aller seruir les estrangers. En peu de temps vous ferez vne flotte innombrable, & couurirez la mer de voiles, & si vous employerez quantité de ieune Noblesse qui demeure inutile, & qui s'abastardist.

LE SEL ET LES AYDES sont encores deux rudes charges, la premiere bien plus grande que la seconde: parce qu'il est bien plus aisé de se

passer d'aller à la tauerne, que de manger du sel-  
aliment nécessaire. Neantmoins ie ne croy pas  
que vous en deuiez pour ceste heure demander  
l'extinction ou la diminution : il suffira que le  
Roy relasche les tailles, fardeau presque insup-  
portable, iusques à ce qu'ayant racheté tout  
son domaine, Dieu luy ouurira les moyens pour  
rendre la liberté à la France. De tous les mesna-  
ges du temps passé ie n'en ay approuué qu'un  
seul : c'est or amoncelé dans la Bastille ne m'a  
iamais esté de bon augure. Le vray thresor d'un  
bon Roy est dans le cœur & dans la bourse de  
ses subiects. I'ay condamné ceste conuersion  
des octrois extraordinaires & à temps, en rece-  
pte ordinaire : outre, que c'estoit prostituer la  
foy du Prince qui doibt estre inuiolable : c'estoit  
oster un moyen de secourir l'Estat à vne extre-  
mité. Le seul mesnage donc que i'ay estimé  
estoit le rachapt du domaine en seize annes de  
iouissance, & neantmoins c'est celuy seul qu'on  
a renuersé : Dieu le pardonne à ceux qui en sont  
coupables. Remettez donc, s'il est possible, sur  
pied ces partis, & qu'ils soient executez sans ex-  
ception de personne du monde. Le domaine du  
Roy s'appelle sacré : parce que veritablement  
on ne peut y mettre la main sans sacrilege. En  
general, reiettez avecques honte ceux qui vous  
proposeront des expediens pour augmenter la  
recepte des finances : le peuple n'est que trop  
chargé. Et au contraire accueillez à bras ouuerts  
les aduis qui vont à diminuer la despence, soit  
par retranchement legitime, soit par bon mes-



nage. C'est le seul moyen qui reste pour soulager le Royaume.

Messieurs, voicy le dernier de nos maux & le plus agité en ceste saison, la mangerie des officiers : nous auons desia parlé de ceux de finance, restent ceux de iustice. Ce mal a plusieurs racines, il les faut tousiours suiure exactement. Il y a la dispence de quarante iours qui rend les offices comme hereditaires, la venaliité qui les met en commerce, & le gain ordinaire & toleré qui les encherit. Il seroit à desirer qu'on peust guerir ces trois maladies tout d'un coup, mais il est bien mal-aisé : tant de gens & si puissans dans l'Estat y sont interessez que ie craindrois que le remede ne fust pire que le mal. Il faut d'oc y aller pied à pied & insensiblement. La valeur excessiue des offices est le fondement de ce desordre, il y en a pour cent millions d'or en Frrce : Le seul moyen qu'on a de le sapper, c'est d'oster aux Iuges les espices & toutes sortes d'emolumens : d'une pierre vous frapperez deux coups, vous les ferez ramander, & si vous soulagerez grandement le peuple, qui n'a pas tant d'interest à la venalité ou à la Paulette, comme à l'oppression qu'il sent à cause des exactions des ministres de Iustice : Outre que cest expedient sera vtile au public, aduantageux & honorable pour le Roy : il sera tres-bien receu de la robbe longue : en ce mestier-là tout le monde fait profession d'honneur, au moins en apparence. Tellement que les plus cupides & les plus auares d'entre-eux loueront les premiers ceste reformation. Au lieu  
que

que si vous touchez à la Paulette ou à la venalité, les plus gens de bien se plaindront, parce que veritablement ils seront ruinez. Par ce moyen nous n'aurons plus de procez en France dans dix ans. Les Iuges en font beaucoup plus que les parties. La iurisdiction des marchands est, sans contredit, la plus courte & la plus equitable: parce qu'elle n'a point d'emolumens. Monsieur le Chancelier de l'Hospital en ceste seure remonstrance qu'il fit au Parlement de Rouën à la maiorité du Roy Charles IX. leur reprochant qu'anciennement ce n'estoit qu'un eschiquier qui ne trauailloient que six semaines, & qu'à l'heure il voyoit cent Iuges trop occupez, & recherchant curieusement la cause de ce chancre enuenimé qui croissoit à veüe d'œil, n'en trouue point d'autre, si ce n'est que chacun veut viure de son mestier, & iceluy faire valoir. Sur tout, Messieurs, prenez garde de ne mescontenter pas tous les officiers, si a mesme temps vous ne vous resoluez à soulager grandement le peuples & à leur gagner le cœur. Henry III. en fut mauuais marchand: il osta la venalité & empescha les resignatiōs en quatre vingts deux, trois, quatre, cinq, six & sept: & en quatre vingts huiēt toutes les villes de France se reuolterent contre luy. Je sçay bien qu'il y auoit d'autres causes malignes concurrentes à ceste sedition: mais, croyez-moy, celle là ne poussa pas peu à la roüe. Naturellement les peuples ayment le changement, & s'y portent s'ils ne sont retenus par la crainte des punitions. De façon que lors



que les Magistrats ou les incitent ou font semblant de ne les veoir pas, tout se precipite à la confusion. Sans doubte que la Paulette est vn grand mal, mais elle a produit pour le moins ce bien durant nos derniers mouuemens, que pas vn officier ne s'est dementy de son debuoir. La raison de cela est, que le prix tres-grand de leurs offices les interesse tous à la conseruation de la paix, & à la manutention du seruice du Roy: & qu'on en dise ce qu'on voudra, les hommes n'ont point de plus forte chaisne que leur interest, ny de passion qui les emporte plus violement. Toutesfois, Messieurs, si vous voyez l'esprit du Roy porté à reformer tout son Royaume, & à soulager son peuple, donnez hardiment conseil de guerir toutes ces trois maladies ensemble: avec ces precautions il ny aura rien à craindre: Dieu se messera de la partie, & favorisera indubitablement vne si sainte resolution: pourueu que l'ordonnance soit suiuite pour les suppressions, & pour les nominations ez offices singuliers. Sur la demande des Estats generaux derniers, la Paulette fust ostee, qu'en arriua-il? Les premiers offices qui vacquerent furent donnez à des valets de chambre, & à des cheuaux legers: il y en eut parmy eux qui furent assez insolens pour enfoncer les portes d'un officier malade, à fin de veoir s'il estoit encores expiré: Cest outrage excita de si grandes clameurs, que le Roy fut contraint de continuer ce droit pour trois ans.

Si vous aymez l'Estat, faictes qu'on n'oste



pas la dispence des quarante iours, si on n'oste en mesme temps la venalité : autrement vous verrez tout à coup les Parlemens dénuiez de ces vieux arcaboutans qui les soustiennent, lesquels se déferont de leurs charges trois mois apres: Et outre, la plus part de ceux qui voudront courre la fortune feront sans doute leur compte, & tascheront dans le temps de la ieunesse & de la force à se recompenser du prix de leurs offices, & le public en pâtira.

Voicy encores vn expedient pour diminuer le prix des offices, & donner beaucoup de lustre aux compagnies souueraines de France. Affectez incommutablement à la noblesse le tiers de toutes les charges de iudicature, & obligez necessairement ceux qui y voudront entrer à faire vne preuue tres-exacte de quatre races, sans que personne en puisse estre dispensé. Vous rendrez par ce moyen à cest ordre partie de ce que la negligence & la corruption du siecle luy ont osté.

Donnez aduis au Roy qu'il face des Grands iours, qui seruent non seulement contre la Noblesse, mais encores contre les officiers de Iustice, qui sans mentir exercent des tyrannies insupportables. Et à fin que ceux de la Religion pretendue reformee n'ayent pas subiect de se plaindre, & d'opposer l'Edict de Nantes, qui establisset des Iuges pour eux, mettez-en deux des leurs dans ceste chambre, comme au Parlement de Paris, au pis aller cela ne doit point arrester vn remede si absolument necessaire & desiré de tout le monde avec tant de passion, parce qu'il faut

dra que ceux qui voudront auoir leur renuoy, se remettent en estat ; autrement on procedera contre eux suiuant les Ordonnances.

Outre ces remedes il y en a encores d'autres qui peuuent grandement seruir à la reformation de la Iustice. Puis qu'il n'est pas possible de rendre ambulatories tous les Parlemens de France, à cause de la despense : imposez pour le moins ceste loy à tous les premiers Presidens, & à tous les Procureurs generaux. C'est le moyen de faire obseruer religieusement les ordonnances dans ces compagnies, & d'y remettre la discipline, au lieu qu'à ceste heure le plus hardy d'entre-eux n'oseroit auoir fait vne remonstrance au dernier des Conseillers : parce qu'ils veulent tous s'autoriser & establir leur credit. Ostez-leur cest interest : vous verrez que chacun à l'enuy fera à qui mieux mieux dans son departement, & n'ayant qu'un an à estre en vn lieu, choquera indifferemment tous ceux qui ne feront pas bien. Que ceste mesme loy soit obseruee pour tous les Lieutenans generaux & Substituts ez sieges subalternes, sans sortir neantmoins de l'enclos de leurs Parlemens.

SIRE, il ne suffit pas d'auoir estouffé ce monstre, qui vomissoit le feu & la flamme pour embraser cest Estat, & de qui les desseins n'alloient à rien moins qu'à ruyner ce grand Empire, à qui la suite de douze cens années n'a peu apporter que de l'accroissement, les ennemis que de la gloire. Il ne suffit pas, dis-je, pour respondre aux belles esperances que ce genereux



commencement nous à faiſt conceuoir de vo-  
 ſtre Maieſté: Pour rendre l'ouurage parfait, &  
 meriter ce ſainct & auguſte tiltre de Juſte : il  
 faut que vous chaſſiez de voſtre Eſtat ce démon  
 de procez & de chicanerie : ce vautour affamé  
 qui ronge les entrailles de vos ſubieſts. Comme  
 nous vous deuons abſolument & ſans condition  
 toute ſorte de fidelité & d'obeiſſance, vous nous  
 deuez auſſi la iuſtice: c'eſt vne relation neceſſai-  
 re que Dieu a miſe entre les Princes & leurs  
 ſubieſts, dont il s'eſt rendu luy-mesmes non  
 ſeulement iuge & arbitre, mais auſſi garant &  
 vengeur : ce ſeroit tromper voſtre Maieſté que  
 de luy celer que les Roys ſont reſponſables de-  
 uant Dieu, & de ce qui ſe faiſt en leur preſence  
 dans leurs Conſeils, & en leur abſence par leurs  
 Officiers. Voyla pourquoy ce Roy Prophete  
 demandoit pardon des pechez meſmes qu'il n'a-  
 uoit pas commis, iugeant bien qu'il deuoit ren-  
 dre compte de ce que ſes miniſtres auoient for-  
 faiſt ſoubs ſon auctorité, & ſans ſon ſceu. Vous  
 auez gouſté la douceur que c'eſt à vn Roy d'e-  
 ſtre aymé chèrement de ſes ſubieſts : ces gran-  
 des acclamations, ces feux de ioye, ceſte fureur  
 extraordinaire d'auoir arraché du tombeau ce  
 que vous n'aymiez pas, & n'auoir pas pardonné  
 aux cendres, vous ont ſans doute touché au  
 cœur. Face le ciel que vous n'eſprouuiez iamais  
 le contraire. O que c'eſt vn rigoureux fleau de  
 Dieu & faſcheux à ſupporter! Pardonnez-moy  
 ſi ie vous remets ſi ſouuent deuant les yeux l'e-  
 xemple de Henry III. Il eſt aduenu de nos iours,



& les principaux ministres de vostre Conseil en  
 scauent les moindres particularitez. A l'âge de  
 quinze à seize ans il gaigna des batailles, il fut  
 appellé à des couronnes estrangeres par les plus  
 belliqueuses nations de l'Europe, où il força le  
 Turc par la crainte de ses armes de faire la paix  
 avec la Chrestienté: à son retour c'estoit la ter-  
 reur de ses ennemis, l'esperance de ses subjects,  
 l'assurance de ses allies, adoré de son peuple:  
 Et neantmoins sur la fin de ses iours iamaïs Prin-  
 ce ne fut hay à l'esgal de luy: chassé honteuse-  
 ment de Paris, réduit à disputer les faux-bourgs  
 de Tours contre ses subiects reuoltez: bref, mal-  
 heureusement assassiné à sainct Clou. Qui cau-  
 sa cest estrange changement? son Conseil: la  
 mauuaise creance qu'il auoit prise que tout luy  
 fust permis. Vn des plus puissans Empereurs du  
 monde disoit qu'il estoit par dessus les loix: mais  
 neantmoins qu'il estoit obligé plus que tous les  
 autres, de viure selon les loix: parce que chacu-  
 ne de ses actions estoit tiree a consequence & à  
 exemple. Ces gardes qui veillent nuict & iour  
 autour du Louure, ne seruent qu'au faste & à  
 l'apparat: l'amour des peuples est ce qui garde  
 la personne des Roys, & celuy-là, quoy qu'on  
 vous die, SIRE, ne se peut acquerir qu'en les  
 aymant reciproquement: Traitez-les comme  
 vos enfans, & indubitablement ils vous honore-  
 ront comme leur pere: & sur tout souuenez-  
 vous que vous n'estes pas Roy seulement des  
 Courtisans, mais de quarante millions d'ames  
 que Dieu a mises sous vostre charge: vous

avez mille moyens de leur bien faire : & soulager vostre peuple quant & quant.

La verité ne frappe iamais à la porte du Cabinet des Roys : ceux qui y font la presse ny viennent pas pour donner de bons conseils ny de salutaires aduis. Chacun entrant dans le Louure faiët reflection sur son interest, & compose ses actions & ses parolles à la complaisance & à la flatterie. L'histoire conte pour miracle la responce de Poton & la Hire au Roy Charles VII. Si doncques, SIRE, ce discours est plus libre que celuy des Couëtisans ordinaires, ne condamnez pas pourtant la fidelité ou l'affection de son autheur : leur dessein n'est autre que de faire leurs affaires : le mien de vous servir, au peril mesme de ruynier ma fortune.

